

Apstenensia...Punto

Poko siman pasá tabatin un kongreso pa hóbenan boneriano tratando e tópiko salú reprodutibo. Ochent'i ocho hóben entre 12 pa 24 aña di edat a partisipá. Diesinku di nan lo representá Boneiru na e kumbre ku lo tuma lugá e siman aki na Kòrsou.

Mi ta apoyá kombersashonnan ku i pa hóbenan tokante seksualidat. (Mi mes ta duna charla riba e tópiko aki.) Ma mi ta hopi preokupá pa ku e mensahe ku ta presentá. Pa ser mas eksakto, mi ta preokupá pa e mensahe ku **NO** ta presentá.

Segun representantenan di e kongreso, e lema “salú reprodutibo” ta trata ku embaraso hubenil i malesanan transmití seksualmente. Kiko por garantisá salú den e área aki? Apstenensia a wòrdu menshoná komo un pusibel alternativa. Ma e mensahe ku a destaká tabata: “Pensábo bon promé ku bo ta hasi sèks. Anto ora bo ta hasié, sòru ku bo ta protehá.”

Ma esei ta nèt e filosofia ku ta responsabel pa e epidemia di enfermedat venérikiko ku ta asotá nos islanan. Hóbenan ta bin komprende ku un “blas” di latèks por protehá nan kontra malesanan venérikiko ku por menasá nan salú. Komo resultado, e hóben salú ta “hòrta shòrt”, keriendo ku e ta protehá. I e hóben ku ya kaba ta infektá ta pensa ku e por dal bai trankil pasobra kondon ta protehá su partner seksual di kontagiá su enfermedat.

E impreshonnan aki por tin konsekuensia serio! Viro Papiloma Humano ta mata 4000 hende muhé na Merka tur aña. **Bo ta pega ku e enfermedat aki dor di kontakto ku e área rònd di e órganonan seksual ku kondon no ta kubri.** Otro enfermedat venérikiko, manera sífilis, por ta kontagiá di mesun manera. **Kondon no por garantisá salú reprodutibo!**

Na dékada 60, básikamente tabatin 2 malesa venérikiko so. Desde 1970, gobièrno merikano a gasta mas ku **\$3 biòn** pa propagandá kondon. Kiko ta e resultado? Eskalashon anual di embaraso hubenil i un epidemia desfrenado di enfermedat venérikiko! Awor tin mas ku 25! Algun ta inkurabel i fatal! Den último añanan, mas i mas na Merka, apstenensia ta promové komo e **úniko** solushon. Kiko ta e resultado? Embaraso hubenil a **BAHA! Nos tin ku habri wowo! Kondon ta laga nos na kaya! Nos mester stóp di promové uso di kondon!**

Algun hende ta di opinion ku nos mester enkurashá uso di kondon pasobra hóbenan lo hasi sèks tòg! Rasonamentu asina ta absurdo. Nan mes ta rechasá e lógika ei pa ku droga! Nan no ta rasoná, “Nos yunan lo usa droga tòg, pesei mihó nos duna nan un hanskun pa nan no kima dede ora nan ta hum'é!” Alkontrario nos ta siña nos yunan pa bisa “Nò!” na droga. **Nos tambe POR siña nos yunan pa bisa “Nò!” na sèks promé ku matrimonio!**

Na 1992, (EXTRA, 13 mei) un investigashon tokante AIDS na Boneiru a deskubrí ku 25,7% di hóbenan riba 15 aña den enseñansa atvansá ya kaba tabatin relashon seksual intimo. Ripará bon ku esei ke men ku **74,3% di e hóbenan NO tabata seksualmente akitvo!** Ta mentira pa bisa ku tur hóben lo hasi sèks tòg, pesei duna nan tur un kondon!

Ta importante pa papia ku nos hóbenan tokante salu reprodutibo. Ma muchu mas importante ta e mensahe nos ta duna nan! Ki mensahe e mester ta? Abo disidi! Kua ta mas salú: kondon òf apstenensia? Kua ta garantisá salú reprodutibo: kondon òf apstenensia? E kontesta ta mas kla ku di dia!

Nos Kreador tabata sa e kontesta ora El a krea nos. Pesei El a bisa, “*Hui for di inmoralidat*” “*..apstené boso di inmoralidat seksual...*” (1 Korintionan 6:18; 1 Tesalonisensenan 4:3).

Si nos di bèrdat ta interesá pa nos hóbenan gosa salú reprodutibo, nos lo duna nan 1 mensahe so, anto bon kla: **apstenensia...punto! Nada mas! Nada ménos! Pasobra apstenensia SO ta GARANTISA salú reprodutibo! Punto!**